



Inatsisartunut ilaasortaq Mette Arqe-Hammeken, Naleraq
inatsisartut@inatsisartut.gl

**Maani nunaqavissunut bilitsit akikillineqarsinnaanerinit periarfissat pillugit § 37
naapertorlugu apeqquteqaammut 2026-118-imut akissut**

Dato: 03-08-2026
Sagsnr.: 2026 - 12934
AKT. ID.: 26641125

Asasara Mette Arqe-Hammeken

Inatsisartut suleriaasianni § 37 naapertorlugu Naalakkersuisunut apeqquteqaateqarputit.
Apeqqutitit uannit akineqartussatut innersuunneqarput. Apeqqutitit matuma kinguliani
ataasiakkaarlugit allanneqarput, akissummillu malitseqarlutik.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
www.naalakkersuisut.gl

**Apeqqut 1. Naalakkersuisut paasissutissiissutigisinnaavaat, 2024-mi, 2025-imi
kiisalu 2026-mi piffissami kingullermik naatsorsorneqarsimasumi nunatta iluani
angalasut qassiusimanersut?**

- a. Naatsorsuineri sapinngisamik timmisartukkut, qulimiguulikkut, umiarsuakkut, aqqutit/ingerlavissat, aallartarfik aamma tikiffik kiisalu kiffartuussinissamik isumaqatigiissuteqarfiusut aamma niuernikkut iluanaarutitalimmik ingerlanneqartut immikkoortillugit paasissutissiissutigeqquneqarput.
- b. Naatsorsuineri aammattaaq sapinngisamik ilaasut Kalaallit Nunaanni aalajangersimasumik najugaqartut aamma ilaasut Kalaallit Nunaanni aalajangersimasumik najugaqanngitsut immikkoortillugit paasissutissiissutigeqquneqarput.

Akissut: Naalakkersuisut naliliipput, Inatsisartut suleriaasianni § 37, imm. 2
naapertorlugu apeqqummut matumunnga akissutissaq annertuallaartoq.

Tassunga tunngatillugu Naalakkersuisunit ilisimatitsissutigineqassaaq, paasissutissat taamaattut paasissutissaasivimmi GoGreenland-imi, Nalik Ventures-imit ingerlanneqartumi pissarsiarineqarsinnaalernissaat sulissutigineqarmat. Naalakkersuisut angallanneq suliassaqarfillu attuumassuteqartut allat pillugit paasissutissanik pissarsisinnaalernissaat anguniarlugu suliaq taanna aallartinneqarsimavoq.

**Apeqqut 2. Naalakkersuisut paasissutissiissutigisinnaavaat, Naalakkersuisut
imaluunniit angallassinermik ingerlatsisut attuumassuteqartut ullumikkut
paasissutissanik peqarnerisut, nunatta iluani angalanerit qanoq annertutigisumik
Kalaallit Nunaanni aalajangersimasumik najugaqartunit ingerlanneqartarnersut
takussutissiisinaasunik?**

- a. Paasissutissat taamaattut pigineqanngippata, Naalakkersuisut qanoq naliliippat, Kalaallit Nunaanni aalajangersimasumik najugaqartunit nunap iluani angalanerit amerlassusaat allaffissornikkut isumannaatsumik qanoq naatsorsorneqarsinnaanersut?

Akissut: Assartuussinermik suliaqartut angallavitik akimorlugit ilaasut amerlassusaannut paasissutissanik peqarput. Taamaattumik nunami namminermi angalasunit qanoq amerlatigisut Kalaallit Nunaanni nunaqavissuusarnersut aalajangersimasumik takussutissaqanngilaq.

Inniminniissummik tamatumunnga tapersiisussamik peqarpat aatsaat maani nunaqavissut amerlassusii naatsorsorneqarsinnaapput. Inniminniissut atorpeqartoq nunaqavissut bilitsisinerminni najukkamut uppersaammik takutitsinissamik piumasaqaammik peqarpat naatsorsuisoqarsinnaavoq.

Apeqquut 3. Naalakkersuisut nassuiaateqarsinnaappat, nunatta iluani angalanernut tunngatillugu ullumikkut akikillisaatit, tapiissutit imaluunniit bilitsit immikkut ittut suut atuunnersut?

- a. Nassuiaammi meeqqat, inuusuttut, utoqqaat, ilaqutariit, kiffartuussinissamik isumaqatigiissuteqarfiusuni najugaqartut kiisalu isumaginninnikkut pisariaqartitsineq tunngavigalugu aaqqissuussinerit pillugit akikillisaatit ilannguteqquneqarput.**
- b. Naalakkersuisut akikillisaatit taakku angallassinermik ingerlatsisut namminneq aningaasalersorneraat, pisortat tapiissutaatigut aningaasalersorneqarnerat imaluunniit allatigut aningaasalersorneqarnerat paasissutissiissutigissagaat kissaatigineqarpoq.**

Akissut: Apeqqutip akineqarnissaanut atatillugu Arctic Umiaq Line A/S, Disko Line A/S aamma Air Greenland A/S oqaloqatigaakka.

Arctic Umiaq Line A/S ilisimatitsivoq, soraarnerussutisialinnut aamma siusinaarluni soraarnerussutisialinnut 25 %-inik akikillisaasiisoqartartoq. Akikillisaatit inissanut akikinnernut aammalu inissanut akisunernut atuupput.

Disko Line A/S ilisimatitsivoq, kiffartuussinissamik isumaqatigiissuteqarfiusuni meeqqanut (2-11-nik ukiulinnut) aamma soraarnerussutisialinnut (65+-inik ukiulinnut) 50 %-inik akikillisaasiisoqartartoq. Taakku saniatigut naalungiarsunnut marluk inorlugit ukiulinnut 100 %-inik akikillisaasiisoqartarpoq.

Air Greenland A/S imatut ilisimatitsivoq:

"Kiffartuussinissamut isumaqatigiissuteqarfiusuni bilitsinut akinik aalajangersimasunik aamma naalungiarsunnut, meeqqanut soraarnerussutisialinnullu akikillisaatinik aalajangersimasunik atuutsitsisoqarpoq. Taakku Namminersorlutik Oqartussamut kiffartuussinissamut isumaqatigiissutit aqutugalugit aningaasalersorneqarput. Tamatuma saniatigut Air Greenlandip tunisassiaq Ilik, peqatigiiffinnut, timersoqatigiinnut atuartunullu tapiissuteqarfiusartoq neqeroorutigaa.

Sumiiffinni unammilleqatigiiffiusuni bilitsit akii allanngorartut, kisiannili naalungiarsunnut, meeqqanut soraarnerussutisialinnullu procentinik aalajangersimasunik akikillisaateqarfiusut atuutsinneqarput. Taakku assartuussisoq aqutigalugu aningaasalersorneqartarput. Tamatuma saniatigut Air Greenlandip nunami namminermi aammalu Imapik qulaallugu angalasunut tunisassiaq Ilik, peqatigiiffinnut,

timersoqatigiinnut atuartunullu aammalu ilaqtariinnut tapiissuteqarfiusartoq neqeroorutigaa."

Apeqqu 4. Naalakkersuisut missiliuussisinnaappat, Kalaallit Nunaanni aalajangersimasumik najugaqartut nunap iluani akikinnerusumik angalasinnaalissappata, tamanna pisortanut allaffissornikkut aningaasaqarnikkullu qanoq kinguneqassanersoq, matumani aaqqissuussinerit assigiinngitsut, soorlu nunap iluani angalanernut 10 %, 20 %, 30 % aamma 50 %-imik akikillisaatit tunngavigalugit?

Akissut: Nunami namminerimi inunnut najugaqavissunut akikillisaatit Nunap Karsia aqputigalugu aningaasalersorneqassappata, tamanna pisortanut annertuunik aningaasartuuteqarfiusussaavoq. Aningaasartuutit taakku akikillisaatit annertusiartornerat malillugu qaffattussaapput. Naalakkersuisut aningaasartuutissanut taakkununga missiliuinerinik suliaqarsimanngillat.

Kisiannili qitiusumik allaffeqarfimmi allaffissornermut aningaasartuutitut ingerlaavartunut aningaasartuutissat annertunngitsutut naliliiffigineqarput, kisiannili sullissisut saniatigut aningaasartuutaat bilitsit akiinut ilanngunneqassanngippata, Nunap Karsia sullissisup inniminniissutaanik allannguutitnik pilersitsineranut ingerlatsineranullu aningaasartuutitnik akileeqquneqarsinnaavoq.

Apeqqu 5. Kalaallit Nunaanni aalajangersimasumik najugaqartut nunap iluani akikinnerusumik angalasinnaalissappata, tamanna innuttaasunut allaffissornikkut aningaasaqarnikkullu qanoq kinguneqassanersoq Naalakkersuisut missingersorsinnaavaat?

Akissut: Tassani aamma akikillisaatit Nunap Karsia aqputigalugu aningaasalersorneqassappata, tamatuma allaffissornermut aningaasaqarnermullu kingunerisassai innuttaasunut iluaqutaasussaapput.

Bilitsimik inniminniinerimi nunaqavissuunerup uppersarsarneqartarnerata saniatigut innuttaasunut allaffissornikkut kingunerisassat annertussanngitsut naatsorsuutigineqarpoq, tamatumunngali maannarpiaq aaqqiissutissanik peqanngilaq.

Bilitsit akikinnerusut akileraarutit qaffannerisigut aningaasalersorneqassappat, aningaasartuutissat akileraartartunut tamanut eqquisussaapput.

Apeqqu 6. Kalaallit Nunaanni aalajangersimasumik najugaqartut nunap iluani akikinnerusumik angalasinnaalissappata, tamanna inuussutissarsiornermut, allaffissornikkut aningaasaqarnikkullu qanoq kinguneqassanersoq Naalakkersuisut missingersorsinnaavaat?

Akissut: Akikillisaatit Nunap Karsia aqputigalugu aningaasalersorneqassappata, inuussutissarsiornermut allaffissornikkut aningaasaqarnikkullu kingunerisassat allannguuteqassanngitsut ilimagineqarpoq. Ingerlatseqatigiiffit namminneerlutik akikillisaatinut aningaasalersuissappata, tamanna akikillisaatit annertussusaat malillugu ingerlatseqatigiiffit kaaviiartitaannut sunniuteqarnerluttussaavoq.

Bilitsimik inniminniinerimi nunaqavissuunerup uppersarsarneqarnerata saniatigut inuussutissarsiornermut allaffissornikkut kingunerisassat annertussanngitsut

naatsorsuutigineqarpoq, kisiannili qanorluunniit pisoqaralarpat tamanna sullissisut allaffissornikkut suliaasa annertusineranik kinguneqartussaavoq.

Taakku saniatigut sullississummik, akit nikerarnerinik suliaqarsinnaasumik pilersitsinermut ingerlatsinermullu aningaasartuuteqartussaavoq, ilimanarluinnarporlu aningaasartuutit Nunap Karsianit taarsiiffigineqanngippata ingerlatseqatigiiffiit aningaasartuutitik bilitsit akiinut tapiliutissagaat.

Apeqquut 7. Kalaallit Nunaanni aalajangersimasumik najugaqartut nunap iluani angalanernut akikillisaavigineqarsinnaalernissaat inatsisinik allannguinnissamik, aningaasanut inatsimmi aningaasaliissuteqarnissamik, kiffartuussinissamik isumaqatigiissutinik allannguinnissamik imaluunniit angallassinermik ingerlatsisut angallassinissamut isumaqatigiissutinik nutaanik pisariaqartitsissanersoq Naalakkersuisut nassuiaateqarsinnaappat?

a. Taamaattoqassappat, inatsisit sorliit, kiffartuussinissamik isumaqatigiissutit sorliit aamma isumaqatigiissutit sorliit pineqassappat?

Akissut: Kontomut pingaarnermut 72.20.05 Ilaasunik angallassinermut tapiissutit oqaasertaliussaq nr. 2 naapertorlugu Naalakkersuisut isumaqatigiissutigineqareersunut tapiuissamik imaluunniit qinigassatut isumaqatigiissuteqarnissamut, pisariaqartillugulu tamakkiisumik aningaasaliissuteqartoqannginnerani isumaqatigiissutaareersut taakku malillugit iluarsineqarnissaannut inatsisitigut tunngavissaqarput. Isumaqatigiissummik pioreersumik allannguisoqassappat, illuatungeriit akunnerminni isumaqatigiinnissaat pisariaqarpoq.

Akikillisaat nutaaq kontomut pingaarnermut aningaasaliissutaasunut sinaakkutissat avataanniippat, aningaasaliissutit ilaneqarnissaat pisariaqarpoq.

Kalaallit Nunaata kujataani qulimiguulimmik timmisartuussinerup neqerooruteqartitsiffigineqarnissaanut najoqqutassani, tamanut ammasumik saqqummiunneqaqqammersuni, neqerooruteqartup atortuni nunaqavissunut akikillisaatinik immikkut ittunik suliaqarsinnaanersut pillugu nassuiaateqarnissaa suliassat nassuiaatigineqarnerini piumasaqaatitut ilanngunneqarpoq.

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga

Iddimangiiu Jensen Bianco

Iddimangiiu Jensen Bianco